

翅物軒文稿

翹勲軒叢稿之一

翹勲軒文集
讀書識解

民國二十年二月十日出版

翹軒文集
勸學餘刻
讀書識餘

定價大洋二角五分

著

者

彭

作

楨

印

刷

者

世

界

印

刷

局

代

售

處

青

雲

閣

富

文

齋

琉

璃

廠

國

粹

書

莊

各

大

書

坊

翹勳軒叢稿初編序

不曰叢書而曰叢稿者明其不足與於著作之林也余年屆知非既無功烈又鮮詞采孔子所謂五十無聞斯不足畏者非歟今印舊稿俾後之人知玩劣如余春秋荏苒所刊者皆卑近不值通士一哂庶幾及時孟晉不致如余之百無一成也民國二十年一月一日

目錄

翹勳軒文集

讀書識餘

古今同姓名彙編

卷帙甚繁同時另刊

蓬萊箋啓

漢魏六

朝縣長縣吏考

歷代名人壽數表

以壽數長短爲先後不同以時代爲先後下同

歷代帝王壽數表

三省從政錄

翹勳軒偶筆

翹勳軒集聯

翹勳軒謎

語 楹聯別話

接梁氏所著

歷史人名對

歷史地名對

物名對

陽歷月令初編

仿舊日月令粹編之例

棄書羣書彙抄拾殘羣書類雋拾殘

兩漢蒙拾分類

中外

格言錄

翹勲軒文集序

西人著書與吾國異吾國人士每喜晚年成書甚至有追悔疇昔所作因而燬板者西人則少壯有所見卽撰述問世閱時稍多意旨與前殊其出書亦判若兩人於此可以覘學問之長進與否及環境之是否變遷故舊作亦多不願改更余學薄義陋偶有所作雅不欲存茲因解篆回平姑就廿餘年來拙稿選錄若干首應試文則附於下卷均係當日原著其意旨有與今迥異者亦無心刪潤酒後取閱聊復自笑若云問世則吾豈敢

民國二十年一月一日（昭明文選錄詩賦古文析義亦然茲從其例）

目錄上

贊 彭祖贊

頌 漢光武頌

賦 稷山縣鐘樓賦

記 稷山縣修看守所記

書 代施嘯生呈某師書

讀文獻通考 十一首

商鞅誘晉人力農使秦人應敵 堯至唐戶口及墾田數 班志所言與

泰西新義合 漢唐宋田制 評王船山論賦稅 北齊役法及奴婢受

田 唐裴埴變送使額爲上供 唐天成勅每畝納麴錢五文

吳越王錢宏佐復稅三年 經界法 問限民名田之得失

論四首

漢武通西域光武絕西域得失論 朱浮諫牧守易代論 溫嶠爲東晉

第一人論 論尚書春秋爲史原

目錄下

論十首

荀彧黨於魏武復沮董昭九錫之議論 蕭望之劾趙廣漢摧辱大臣論
衛青不招士論 孔光削草論 齊桓晉文皆以出奔返國而霸論
張璠桂萼俱以議大禮進二人優劣若何論 汲黯東方朔論 法者天
子與天下所公共也論 三老掌教化嗇夫職聽訟收賦稅論 秦孝公
下令求能以奇計強秦者論

詩四首

海市 牡丹 偶成 重九

每首題目下皆注明所著之年目錄不列

翹勲軒文集上

翹勲軒叢稿之一

開縣彭作楨撰

彭祖贊 並序 依 炎師所刪改者 民國十三年

民國七年冬余任山西萬泉縣知事視縣志文村有后稷山爲萬泉稷山安邑夏聞喜五縣界其上有籛鏗墓嘗擬乘馬往訪因事中止明年署稷山縣事距此山更近由河東謁道尹歸遂迂道陟山巔見有大塚而無碑記問之土人則曰山旣爲后稷播種之地且有廟則此塚當屬后稷然考之稷山縣志殊不言塚爲何人也山海經海內經西南黑水之間有廣都之野后稷葬焉注黑水廣都今之成都也淮南地形訓后稷壠在建木西其人死復蘇則稷山之塚非后稷昭晰矣續博物志彭城縣古彭祖之國也世本曰陸終之子其三曰籛是爲彭祖下曰彭祖塚彭祖長年八百而有塚者蓋亦立極之化水經注彭祖城下有彭祖塚寰宇記引彭門記今墓猶在故邑號大彭焉據此則彭祖塚在今江蘇銅山縣銅山者古彭城也今縣志載彭祖宅在城西北隅宅有井而遍尋境

內僅有彭祖廟不知塚之所在稷山距堯舜禹建都之地皆不遠且彭祖與后稷同祖歿而葬於此或亦理之所有然萬泉縣志所紀不言其出於何書思之至久終以爲疑夫古來聖賢少長居處及其歸神之地今之縣志每相爭以爲榮或著論互爲駁辨而不自知其失真也吾人處此有確徵者從之否則宜守孔子多聞闕疑之義矧彭祖爲余族受姓所由始豈可妄指無名之塚而失於誣乎列仙傳載彭祖躋高年而歸本於少好恬靜他書所錄大端不殊則其可傳者固在彼不在此耳呂氏春秋審爲曰能尊生雖貴富不以養傷身雖貧賤不以利累行淮南子曰心者形之主也而神者心之寶也形勞而不休則蹶精用而不已則竭此爲不恬靜者宜有之事彭祖惟尊生故能恬靜惟恬靜故壽八百小子體素孱弱而時嬰垢氛念先代高年之所自不絕於懷因撰斯贊郵稷請刊石樹之山巔豈惟自警亦以使世之競利忘身者覩而思返也其辭曰

縹縹彭祖系出顓頊外象不蔽

列仙傳殷王欲害之彭祖乃去

內機遠燭養拙凝神餐和寡欲九

仙是儔五龍可續散空麀角粉徒水精丸珍獨睡籙授長生
彭祖嘗云服藥百顆不如獨臥鄭鄉
有紀楊冢難明鵠翼高翔豈滯佳城李充三期李阿八百未若我祖炳炳羣籍
妄傳陰道並貪叢劇五蓋幽深味茲遯迹

此贊曾郵呈吾 師章太炎先生郢削民國十三年九月奉 回示計改

十四字增一字刪除九字茲謹錄 炎師回示於左

所作彭祖贊全體皆佳爲易數字即可刊石矣古今言彭祖所處者皆云
彭城大彭稱霸亦在其地然太史五帝本紀稱禹皋陶契后稷伯夷夔龍
垂益彭祖自堯時而皆舉用未有分職大戴記五帝德篇云堯舉舜彭祖
而任之則彭祖固當處堯都矣方志所言多出傳會然因於故老傳說者
亦不盡無徵疑則傳疑勿以身質可也

漢光武頌 齊梁體 有序 民國十四年七月

余生平不信夢有徵兆然自識字染翰以來輒夢讀古籍或自撰詩文語有奇

警可喜者不悉記也客歲陽曆一月六日之夕卽夏曆癸亥臘月在太原省城夢操觚頌光武醒時尙憶二語云材包衆將智絕羣胸次日以語敝連襟楊君澄侯共相驚詫未幾余來魯澄侯則由晉赴豫握息縣篆前月函招余陶邀開封藉抒宿悶余雖一時不克往而以光武爲南頓令劉欽之子後都洛陽兩地皆在今豫境頓觸前夢愉娛者久之考光武與功臣讌語問曰諸卿不遭際會自度爵祿何所至鄧禹對以可郡文學博士光武許爲椽功曹馬武自認守尉督盜賊光武笑曰且勿爲盜賊可致亭長嗟乎邦國清夷則錐刀未由效世值霧茅雖劇盜亦輸力若乃負康世之略丁羅才之時絕援寡助空思齒召欲求爲椽功曹及文學博士而亦嗇其遇縉梁莫分於雁鷺幽介難返夫邱樊抱影落落尙安望如鄧禹之濯鱗飛翼淑問無窮哉時無光武彫枯者多付之歎喟而已雨後爽適聊作斯頌取夢中語足成之並柬澄侯請其過光武廟時代爲

叩謁其辭曰

陸弔魏君愴懷遣令沈夢漢武踞陳至性頑鹵之姿夙眇憂柄擗管窮天棲神
炎政翹翹光武龕亂夷凶材包衆將智絕羣胸太清是鑒遠算可宗賊寬朱鮪
運復赤龍朽鈍思奮割裂得展出吳賀牋矧迺豪英能無昭闡望鄧道阻後漢書注南陽郡今鄧州
縣遊汴緣淺聲靈可憑雲物遙顯

范氏有贊專美光武之功烈拙作避複故另闢一徑

漢高祖創平民革命之局爲黃帝子孫生色光武雖宗室後然手無寸柄崛起
起南陽與平民何以殊哉恢廓大度同符高祖在當時固有定論矣自記

稷山縣鐘樓賦

以題爲韻

並序

民國十年

宋時吳中大饑范文正公召諸佛寺大興土木整理厥倉吏舍意在便貧民傭
作不致轉徙溝壑民國九年亢旱成災十年辦理春振余仿文正公之意既提
罰金及差徭餘款修法庭常平倉而鐘樓傾圯百餘年帑藏匱乏欲修之而未
能賴羅紳公玉王紳疇五公甫等樂捐鉅款梁紳郁堂又始終督理其事不辭

勞瘁閱半載而工成籟和月下砧間風前雖渺齊雲落星之華足備警衆考辰之用且七六十年古物一朝軒豁其快意爲何如余不揣拙艱因操觚爲之賦

大定紀年世宗登極除迎賽神佛之禁條

金史世宗本紀除迎賽神佛禁令

善模擬唐虞之美德

世宗本紀贊號稱小堯舜

茅簷則家給民康

世宗本紀贊家給人足倉廩有餘

蘭若則心安安息故能結香緣勵

道力懸寶樓光上國幢玉騰聲浮金生色長夜炳燈清秋報稷粵稽吾邑早建玄關當靖康之版蕩隸鞅鞶之宇寔蓮花突湧貝葉頻頒則有僧名智信性異疎頑結緇流而發願寫梵唄兮忘艱龍文身隱獅子影閒財未縻於金索聲豈應於銅山遂乃薪官僚募賓彥四柱周十方遍鍛工不惜刀烟新婦亦施鉞釧鑪勞風伯之吹冶藉雲師之鍊鐵燄朝鎔金精夜見兩爨九乳相符三紀六平最善形不襲於蒲牢姓先登兮花縣惟是精奇千石掩映百重若不仿晉帝之射雁越臣之飛龍必無以和睇澤貯霜鏞招鸛雀植芙蓉欣雲浮兮朱棟看雨捲兮碧峯休文留韻王粲遺蹤地非飛譙之壘事異景陽之鐘無如榮華歎月

才器悲秋滄桑迭變井榦失修空勞鶴駕無復鳳遊惆悵藏書之子寂寥賣酒
之僇籠碧紗兮何處咏明月兮難酬物雖徵於雉雖聲不雜於鷄籌晷念立橫
之鉅器馳思望海之高樓茲者闐闐喧闐懷費密固樹老而無苔封梅新而雜
柳故齊西北兮于青雲照東南兮揚紅煦音似龍吟吼如虎怒重次萬鈞炤騰
千炷匪寶鑄之唱酬仰霍山之鎔鑄昔徵彝典以列銘今厲清風而獻賦

仿庾子山體自記

鐘上姓名有新婦故賦中言之

稷山縣修看守所記

民國九年

稷山向無看守所待質者皆押於警察棚內今援照部章省令另行修理計前
後兩院共房屋十七間兼增獄室五間董其事者王紳疇五及公甫梁紳郁堂
馬紳錫三公欸局喬君子立督理經營辛勤靡懈閱四月始告成請余爲文以
記之余義不獲辭竊維有虞之誅以幪巾當墨以草纓當劓以菲履當刖以艾

鞞當宮布衣無領當大辟畫衣冠異章服謂之戮尙書大傳孔子引語曰夏后氏不殺不刑罰有罪而民不輕犯斯時國無幽圉更何有看守所越在叔季訊牒繁多嬰金履校証逮還廣不分別已未決均被攝錄觀於絳侯之繁獄室罪狀未昭卽致徽繩是祇有牢犴無所謂看守所也晚近參處法意至析秋毫經察判者被徒衣俟裁問者免膠致獄室看守所別部居刑政精進乃至斯乎然於未決犯之外尙有二事一曰罰鍰管子治齊小罪入以金鈞分宥薄罪入以半鈞梁詔入縑以免往古或屬權典今乃定爲憲墨而因訊辦甫完顧山無措則不得不暫行看守以待輸納者勢也二曰寄禁夫憲有輕重寬猛隨之今於細人所犯雖不能妄爲慶宥加以蠲汰而壹是歸諸獄圉在縲嬰纏齊竟陵王子良所謂暑時鬱蒸加以金鐵聚憂之氣足感天和讀竟能勿悽惻則因園牆積滿不得不酌移以示微恩者又勢也雖然法者待人而行廢格沮誹民將無所措漢范滂繫獄吏加掠考唐時待罪人泥耳籠頭枷研揔摺脅籤爪縣

髮薰耳臥鄰穢溺曾不聊生號爲獄持可見當時典獄者之無人道感化主義播自西歐然吾國亦非絕無行之者宋紹聖四年令諸獄置氣樓涼窗設漿飲薦席杻械五日一浣繫囚以時沐浴遇寒給薪炭蓋合已決未決者而言獄官果遵奉斯意困弊必可昭蘇又沿情察訟貴在持平南史云法嚴則人思善德多則物生惡若妄慕圜空深恨衆猥蕩滌淫盜失於仁柔必致毫猾橫恣姦宄公行反是則轉相比况習成連坐訊簿稠疊驟異曩科已決者一切取伏未決者日累月增斗室喧囂申挺靡術其失豈不較仁柔更甚哉余律謝皋蘇義取參酌深惟枉直漏惡之足以病民而典獄職兼看守不主持人道亦足令良懦之坐困也故聊贅數語互相警惕用副督軍平典紳士熱誠云爾

代施嘯生呈某師

民國十三年十二月

夫子大人函丈睽隔七年倏接……道範倥偬數語不獲傾吐肝膈恨何如也蓬萊之約倉卒就道未克面辭迄今思之尤爲耿耿冬寒伏惟……動止

曼福受業質鈍如鎚學殖荒蕪惟年來馳逐縉塵閱人不尠棖觸于懷輒復長嘆幼年讀唐宋人文集見有惜其才之不遇者以爲此文士譽人通語耳果其得時未必能整敕率物澤逮閭閻也及年漸長游漸多始恍然於唐宋名人所深惜者今乃時時相覲大約古今賢豪當析爲四一曰求名而得名者二曰不求名而得名者三曰求名而不得名者四曰不求名而遂不得名者何謂求名而是得名負卓犖之姿勵志雲霄勳在當時謳歌不替二十四史所載各功臣也何謂不求名而得名睥睨軒冕獨怡其天揮綽之聲避之若浼而卒也帝王相欽草茅揚播巢父許由是也何謂求名而不得名慷慨以利民爲期並欲厠身青落簡拓將老始退而著書時變世移散佚無存正史說部所未及載者皆是也何謂不求名而遂不得名三教九流百家諸子無不精貫而復冲逸其性視身如寄有何於名偶仕則浮沈末宦而無競於時擲管則妙極天人而任其遺棄歲月漸久誰復知天壤間有是人此亦將來正史說部所不及載者也四